

天香室詩卷

清江張

天香室詩卷下

起癸亥迄壬申

河間 邢錦生 麗江

癸亥

春日遊工部草堂漫興

逸社二十六課

竹林深處草堂開，共啜春風茗一杯。
佳節已過人日後，故鄉不見客星來。
戰塵四起猶天寶，詩學千秋幾史才。
坐到夕陽歸未忍，瘦梅零落滿蒼苔。

柳絮

錦江春事漸闌珊，柳絮濛濛卻耐看。
三月落花同是夢，滿城飛雪不生寒。
心疑醉墨趨吟閣，態訝縈塵集舞盤。
日暮東風頻借力，不難吹上碧雲端。

夕陽

晚晴天氣近昏黃獨倚闌干詠夕陽千里欲隨帆影
沒一生常送馬蹄忙東華事去休回首老境人看每
斷腸借問魯戈誰在握莫教容易墮窮桑

清明

錦江流寓客心悲遭際干戈與願違風雨滿城誰上
冢清明佳節獨霑衣啼花鳥解留春住鬪草人能薄
暮歸今昔不殊惟一事柳籃編取貯芳菲

牡丹

管領芬芳節花中爾至尊光常臨綺席交不到蓬門
粉麗春風面香濃曉露痕傾城誰得似一見一銷魂

蜀局

蜀局絲難理江郎鬢欲皤一春霖雨少四野戰雲多

播種忙如此搜牢歎奈何滿腔憂國淚對酒不成歌

懷純嘏

暮雲春樹兩模糊望斷鱗鴻淚欲枯長別豈真成佛
早索居無奈草玄孤水邊遺墨憐蝌蚪花底相思惱
鷓鴣何日故人欣握手一燈風雨話江湖

暮春遣興

逸社二
十七課

懶問靈龜懶問著蜀風重詠太平遲飄零春色誰爲
主撩亂鄉愁只自知何物可傳千載下此生如際六
朝時杜門端合充高隱日課栽花夜課詩

武陵漁人重別桃源桃源人贈別

逸社二
十九課

再來容易去何難不識扁舟幾日還除卻敝鄉無樂
土好傳消息到人間

吳堅仲自京師見懷次韻卻寄

太平氣象歎悠悠憂國如公易白頭天半不時飛玉
弩人間何術補金甌至今蜀道難通馬遙望燕山獨
倚樓愧乏寸長堪告慰閉門藏拙老如鳩

又次其暮春陶然亭韻

陶然一醉暮春天到此如何不悟禪荒冢美人應化
碧故宮喬木欲生煙傷時岌岌頻看劍弔古茫茫獨
擘箋今日讀詩尙神往與君同步小亭前

懶作

懶作封侯想常興避世嗟孤蹤追泄柳萬象悟空花
處處兵戈擾年年賦稅加閉門何以遣長日醉流霞

遊仙詞

寫罷金經滌玉甌，采鸞相約上池遊。
天風吹起淩波影，敲碎珊瑚作釣鉤。

詠石二首

養得山林氣，空齋暑不知。
幾忘雙鬢老，長對一拳奇。
沒羽曾驚虎，支牀合當龜。
寂寥休自棄，終有補天時。
宛轉誰相贈，玲瓏不待磨。
袖藏東海小，船載鬱林多。
日夕生雲霧，家鄉在薜蘿。
可容兄事否，頑壽共山河。

古鏡

逸社三十一課

一片菱花影，千秋不起波。
精神猶月滿，肝膽閱人多。
舊向江心鑄，新從石上磨。
山雞如與對，還作引吭歌。

古錢

同社

知是何朝幣，盈眸綠燦然。
選經劉寵後，鑄在鄧通前。

銅臭今爲烈圓光我亦憐一枚長繫佩不許眾魔纏

伏日

綠槐陰裏有鳴蜩滿耳清音當玉簫亂世不才甘寂寞
伏天何處避炎歊桃笙乍展謀黃嬭筠管閒拈學
白描晚向錦江垂釣去雪山餘凍可全消

戲贈畫中人

六月山深處催租不到門靜泉喧石齒涼雨孕雲根
少慮風神適無官品格尊願偕君小隱何必武陵源
早秋新霽

夜來涼雨洗炎埃骨爽神清亦快哉萬點香飄金井
桂一痕青上玉階苔秋陽難測遲收扇蜀亂方滋數
舉杯索寞江城深自隱故人休薦子雲才

螢

南風初不競奈爾夜游何陋巷光臨早陰叢腐化多
功高慚短燭命薄怯輕羅見賞人安在隋宮詎忍過
有感二首

半爲豺虎半萑苻喻蜀誰能澤及枯軍令搜牢千日
短國租入草一絲無熏香佩玉皆王佐結綺臨春亦
霸圖醉向蒼穹搔首問兩川民困幾時蘇
北兄南弟日干戈井邑蕭條可奈何但見盜名同有
國不知流血已成河眠雲醉月頑仙少附鳳攀龍巧
宦多誰謂陰平曾入寇至今山勢尙嵯峨

月夜懷人

獨坐小亭西瑯瑯誦七發抱琴人不來孤負松間月

不爲

不爲竹戲卽茶圍身佩銅章勝賜緋風馬雲車燈影裏滿街都是米蟲飛

吁嗟

吁嗟蜀道難豺虎正當關燕將空傾國劉郎不下山同舟常互救匹馬幾曾還風雨重陽節銜杯淚欲潸

雜贈五首

霧中玄豹正韜姿蜀道兵戈擾攘時滿甕梨雲消夜酒一簾花雨送春詞騷人懷抱深相證佳節追陪數不疲垂老買山休負約固應多積草堂貲

席前長嘯氣如虹羣仰雄冠劍佩風論力恥居朱亥下偷生肯作白丁終天方喪亂戈難止我亦悲歌酒

不空異日解衣逢聖主將才始信出關東
兀兀成都一草亭先生高志託鴻冥曾從北道空凡
馬誰識東方是歲星荷鍾未能除酒癖閉關端擬著
元經邇來貌似中郎少無怪逢人眼不青

九秋涼露在蒹葭腸斷伊人水一涯金谷舊遊渾似
夢玉臺新詠自成家亂離空寄當歸草遲暮還求解
語花笑我閉門岑寂慣百年甘作井中蛙

小鑿明湖繞翠微叩門深喜客來稀碧苔雨後添蝸
篆黃葉風前學蝶飛萬物靜觀秋亦好百年高卧世
相違聰明詎待頭頰白早向楞嚴悟道機

題僧裝小照

混迹成都市遊心兜率天借花晨獻佛邀月夜談禪

鼎鼎誠無分袞袞夙有緣誰憐身外影不似廿年前

落葉

逸社三
十二課

不逢落葉不知愁簾捲西風亂打頭千里別來懷故
國幾生修到葬清流秋高漸覺霜威重夜靜還疑雨
點稠爲約客談呼僕掃林間煮茗小句留

寒鴉

同社

寒鴉只解斷人腸鎮日飛鳴雉堞旁野况蕭條難覓
食軍容零亂不成行孤村繞處空流水喬木棲時帶
夕陽安得滿身文采煥上林容爾逐鸞凰

菊壽

逸社三
十三課

滿籬秋氣未頽唐依舊輕紅閒淡黃敢詡芳齡侔四
皓不知冷眼幾重陽雲敷玉葉長春域露挹金莖卻

老方戲指南山如獻頌萬年遙奉紫霞觴

菊醉

同社

獨清獨醒世間無莫笑朱贏亦酒徒三雅曷勝蕉葉
勸九秋須得竹枝扶開顏茗芋酬佳節顧影朦朧失
故吾珍重落英儲作釀透瓶香不亞醍醐

冬閨曲三首

逸社三十四課

瓊樓十二飛霜滿酒綠燈紅嫌夜短低拍連昌絕妙
詞流蘇帳底春雲煖

銅荷夜盡銷蘭炷玉盃晨興嚙瓊乳半窗紅旭起來
遲卧聽詩婢調鸚鵡

龍梭罷織鴛鴦錦斜月窺檐紫茸冷泥郎呵凍蘸胭
脂隔窗句取梅花影

梅影

同社

數枝梅影擅風流，點綴黃昏景自幽。
飢鶴啄時方悟幻，美人身外不知愁。
清霜欲溼橫苔徑，明月相扶上竹樓。
好是笛聲吹不落，一牀香夢戀羅浮。

松影

同社

白雲堆裏影毵毵，騷客哦松興正酣。
深愛夕陽臨峭壁，宛疑空翠墮寒潭。
冰霜氣韻圖難肖，水月因緣諦可參。
囑咐樵人休縱斧，千秋留蔭卧龍庵。

書懷

少年豪興付流霞，世變頻經暗自嗟。
執戟有人皆嫵媚，揭竿何處不諠譁。
西山薇蕨愁邊草，北地胭脂夢裏花。
除卻苦吟無樂事，閉門甯守邵平瓜。

疏林

逸三
十五課

無復濃陰橫翠微，幾回悵望倚柴扉。
蕭蕭落葉鴉空噪，寂寂斜陽僧獨歸。
曲徑尋詩初覺爽，遙村入畫不嫌稀。
一椽合逐倪迂隱，歎息人間萬象非。

題畫二絕

小艇打魚歸，回颿動林樾。
遙岑一杵鐘，敲落寒潭月。
古寺隔雲深，澗斷一橋接。
夕陽僧獨歸，踏碎霜林葉。
歎息

歎息干戈擾擾中，錦城容易又寒風。
忘憂濁世無萱草，招隱名山有桂叢。
眼底五經垂欲滅，腰間三尺建何功。
避人甯學東臯子，白日狂歌酒不空。

感蜀王衍事作

風捲降旛出錦城水行仙子亦虛生遙瞻劍閣空垂
淚一箇茅廬結不成

水仙詞四首

逸社三十六課

茅屋人家水一涯碧雲低護玉交差淩波乍見驚鴻
影不數天香國色花

簪弟梅兄共往還藐姑仙子玉爲顏平生不受緇塵
浣長作清風水石間

玉妒瓏玲雪妒嬌影娥池上暗魂銷贈卿麗句應無
愧抱月飄煙一尺腰

骨秀神清敢自誇託根從不避泥沙五銖羅袂風飄
處錯認仙人萼綠華

戲詠扳不倒翁

頑仙失足墮風塵酒食當筵輒現身掌上可擒同傀儡腹中難覓是經綸翩翩敢擬佳公子鞅鞅殊非少主臣莫怪眾賓齊發粲本來面目不如人

乾淨

乾淨眞無土陰森別有天虎狼秦將帥雞犬漢神仙白眼徒遭忌烏衣孰見憐夜來拌一醉遐想入堯年

書事

風聲鶴唳北兵來萬戶千門晝不開苛政莫如間架稅小人原有斗筭才江山但作偏安想水火遑爲庶類哀岌岌危城誰可語未妨緘口借深杯

甲子

元日圍城中作

討賊軍三敗成都氣不春忽來城北戰愁絕歲朝人
殺氣橫天地生靈託鬼神夜窗無夢到一卷獨吟呻

愁

暮北朝南苦用兵救時英主不重生愁來合向山中
去近日豺狼半在城

遊彭縣天台九峰出城口占

不樂居城市煙霞疾已瘳好憑雙足健來作九峰遊
沃野青疇迴長江碧水流太平疑有象盜賊不須憂
彭縣曉發

彭州堪送目一雨散炎氛清白雙橋水高寒九隴雲
時平猶寇盜土瘠亦耕耘只是征徭急哀鴻不可聞
華光寺